



ShapeTxoJ Kev los mus Tsim Ntaub Ntawv Pov Thawj hais tias Tsis Siv Tshuaj & Muab Tswv Yim Pab Koj Xaiv Chaw Tso Cai

TxoJ kev los mus tsim ntaub ntawv pov thawj yog tus txhooj los mus soj ntsuam kom txhua yam nyob txhij raws li txoj kev ua teb uas tsis siv tshuaj rau thiab muaj hmoov kob zaub. Txhua yam khoom qoob loo uas cog tsis siv tshuaj rau uas muaj ntaub ntawv pov thawj uas muag rau hauv teb chaws Meskas U.S. yuav tsum caum cuag raws li cov kev cai tsim tawm los ntawm tsoom fwv lub hoobkas United States Department of Agriculture (USDA) cov kev cai teev tseg rau txhua yam qoob loo uas tsis siv tshuaj. Koj muaj cai xaiv ua ntaub ntawv pov thawj rau ib feem ntawm cov qoob loo uas koj cog xwb, xws li tsuas ua kom muaj ntaub ntawv pov thawj rau ib thaj teb xwb lossis rau ib txhia ntawm koj cov tsiaj txhu xwb los yeej tau, tsuav yog hais tias koj muab cais kom meej meej hais tias cov twg yog cov tsis muaj ntaub ntawv pov thawj rau hos cov twg yog cov uas muaj ntaub ntawv pov thawj hais tias yog cov tsis siv tshuaj rau. Cov qhauv uas koj los pub rau cov tsiaj noj uas muaj ntaub ntawv pov thawj hais tias tsis siv tshuaj yuav tsum pub cov qhauv uas cog los muaj ntaub ntawv pov thawj hais tias tsis siv tshuaj rau thiab.

Cov neeg ua teb uas muag tau nyiaj tsawg tshaj \$5,000 tauj ib xyoo uas muag zaub noj, muag rau neeg tuaj yuav mus noj thiab ua teb raws li cov kev cai tsim tau tseg hais tias tsis siv tshuaj rau, cov zoo li no tsis tas yuav tsum mus ua txhua yam txheej txheem kom tsim tau ntaub ntawv pov thawj. Yog koj ua tau raws li cov lus no, tso cai rau koj muab koj cov qoos loos tias hais tias yog “tsis siv tshuaj rau (organic)” tabsis koj lo tsis tau daim ntawv nplaum uas yog USDA Organic Seal lub kas lossis koj hais tsis tau hais tias koj muaj ntaub ntawv pov thawj hais tias tsis siv tshuaj rau.

Ua ntej koj ua tau ntaub ntawv pov thawj hais tias tsis siv tshuaj rau, koj yuav tsum lis daim ntawv thov, neeg tuaj kuaj tag, thiab ib lub tuam txhab uas ua cov haujlwm txheej txheem rau txoj kev tu tsiaj txhu thiab cog qoob loos uas tsis siv tshuaj rau yuav tsum nrog koj saib txhua yam kom txhij tso. Txwv tsis pub koj muag koj tej qoob loos/tsiaj txhu yam hais tias yog hom tsis siv tshuaj rau ua ntej koj txais tau koj daim ntawv pov thawj thaum koj ua txhua yam tiav tag li lawv pom zoo lawm.

COV KAUJ RUAM LOS MUS TSIM KOM MUAJ NTAUB NTAWV POV THAWJ

Ntaub Ntawv Soj Ntsuam Txoj Kev Koj Siv Koj Daim Teb Li Cas

Yuav kom koj muaj cai cog tau qoob loos uas muaj npe hais tias yog hom tsis siv tshuaj rau, daim av ntawm daim teb ntawd yuav tsum tsis pub muaj cov tshuaj uas raug txwv nyob rau hauv kom txog 36 lub hlis ua ntej koj sau koj thawj thawj phaum qoob loos uas yog hom tsis siv tshuaj rau. Koj yuav tsum teev tseg seb hnuv twg yog zaum kawg kiag uas cov tshuaj lawv txwv ntawd siv rau hauv txhua txhua daim teb thaum twg, yuav tsum muab teev tseg rau hauv koj cov ntaub ntawv pov thawj hais tias tsis siv tshuaj rau. Yog hais tias koj muaj ntaub ntawv teev tau hais tias tag nrho cov tshuaj uas lawv txwv ntawd yeej tsis tau siv rau hauv daim teb los tau peb lub xyoo no lawm, no ces daim teb ntawd npaj tiav siv tau lawm los mus cog cov qoob loos thiab tsiaj txhu uas yog hom muaj npe hais tias tsis siv tshuaj rau. Hos yog hais tias lub sijhawm ntawd, koj tsis yog tus saib xyuas daim teb ntawd, no ces mus nug tus tswv uas saib xyuas daim teb ntawd ua ntej koj kom nws teev cov hnuv rau koj seb lawv siv cov tshuaj uas raug txwv ntawd thaum twg lossis kom nws kos npe rau ib daim ntawv teev tseg raws txoj kev cai lij choj hais tias yeej tsis tau siv cov tshuaj uas raug txwv ntawd rau hauv daim teb li thaum lub sijhawm ntawd.

Xaiv Tus Yuav Los Ua Ntaub Ntawv

Muaj ntau txoj hau kev los mus nrhiav thiab xaiv ib lub tuam txhab ua ntaub ntawv. Mus saib rau koog hais tias “Qhia Tswv Yim Xaiv ib Tug Los Ua Ntaub Ntawv” nyob rau ntawm daim ntawv qhia no seb yuav nrhiav cov tuam txhab ua ntaub ntawv cov npe hu li cas nyob rau hauv Marbleseed lub vevxais thiab ib co lus nug ua piv txwv uas koj nug tau kom pab koj xaiv lub uas yog rau koj.

Thaum twg koj xaiv tau ib lub tuam txhab ua ntaub ntawv rau koj lawm, lub tuam txhab ntawd yuav xa thawj thawj pob ntawv tuaj rau koj nrog rau Cov Kev Cai Tswj Txoj Kev Tsis Siv Tshuaj Thoob Plaws Teb Chaws No, ib co ntawv lis tshiab rau koj, thiab ib daim Teev lub Hom Phiaj Rau Txoj Kev Tsis Siv Tshuaj (Organic System Plan (OSP)) daim ntawv ua mus thov cov ntaub ntawv hais tias tsis siv tshuaj rau cov qoob loos rau lub xyoo ntawd.

Thov Ntaub Ntawv ua Pov Thawj

Koj yuav tsum ua ntawv thov cov ntaub ntawv pov thawj nyob rau xyoo uas koj npaj siab yuav los mus muag koj cov qoob loos uas tsis siv tshuaj rau. Koj yuav tsum lis kom tiav ib daim OSP rau txhua txhua yam uas koj xav kom muaj ntaub ntawv pov thawj rau (xws li, qoob loos, tsiaj, kev sau khoom/ntim khoom, zaub hav zoov). Cov yuav los ua ntaub ntawv rau koj yuav tsum kom koj muaj ib daim OSPs rau ib yam xws li rau tsev ntsuab, cov kua txab qab zib, thiab lwm yam khoom uas koj npaj siab yuav ua.

Nyob rau daim ntawv OSP, piav qhia seb koj daim teb cov haujlwm mus los muaj li cas, nrog rau seb koj npaj siab yuav ua li cas rau koj cov av kom qoob loos zoo taus, yuav hloov qoob loos cog li cas, khoo nroj thiab kab li cas, siv dab tsi (chiv, tshuaj tua kab, tu noob li cas, tej yam li no), sau qoob loos li cas, muab khoom ntim cia li cas, thiab muag li cas. Txhua txhua daim teb yuav tsum muaj keeb kwm nto peb-xyoos qhia txog seb siv tshuaj li cas rau lawm, muaj daim ntawv qhia, thiab npaj siab yuav ua li cas rau cov qoob loos xyoo no.

Thaum twg koj lis tiav txheeb tau txhua yam tag lawm, xa koj daim ntawv thov nrog rau qhov nqi ua ntaub ntawv mus rau lub tuam txhab ua ntaub ntawv pov thawj kom raws raws sijhawm. Thawj thawj xyoo yuav siv sijhawm ntau dua rau koj thiab rau lub tuam txhab ua ntaub ntawv. Pib ua cov ntaub ntawv no peb mus rau rau lub hlis ua ntej koj npaj siab sau koj cov qoob loos uas tsis siv tshuaj rau. Li no, koj thiab li tsis raug them nyiaj hais tias koj ua ntaub ntawv lig lossis koj thiab li tsis tau ntxiv nyiaj rau kom ua ntaub ntawv saib li saib tau rau koj.

Lub tuam txhab saib koj cov ntawv thov tag thiab yog tshuav ntaub ntawv tsis txhij qhov twg lawv mam li hu koj. Koj yeej qhia tau txuas ntxiv, xws li ntaub ntawv hais seb koj yuav noob thaum twg, thaum lub sijhawm lawv tuaj kuaj koj daim teb.

Kuaj Koj Daim Teb Kom Tiav

Koj lub tuam txhab ua ntaub ntawv rau koj mam li nrhiav ib tug neeg tuaj kuaj koj daim teb. Ua ntej hnuv ntawd, npaj tag nrho koj tej ntaub ntawv kom txhij thiab li tsis ncuab lub caij nyoog ntev ntev thaum lawv tuaj kuaj koj daim teb thiab koj thiab li tsis tau them nyiaj ntau. Lawv tuaj kuaj teb yuav siv sijhawm ob mus rau tsib teev, nyob ntawm seb koj npaj puas tau txhua yam txhij thiab yooj yim rau lawv thiab seb koj daim teb loj thiab ntau yam npaum li cas. Cov teb uas muaj tsiaj lossis muaj haujlwm uas mam xeem ua rau ntawm daim teb (xws li, qhov haujlwm ntxuav noob), cov zoo li no yuav siv sijhawm ntev zog. Tus tuaj kuaj ntawd yuav saib tag nrho koj cov ntaub ntawv teev txhua txhua yam thiab nws yuav ncig saib koj cov teb, cov khoom siv, thiab qhov chaw koj ntim qoob loos cia.

Txais Daim Ntawv Txiax Txim txog ntawm Koj Cov Ntaub Ntawv Ua Teb Tsis Siv Tshuaj

Tus neeg tuaj kuaj teb ua ib tsab ntawv mus rau lub tuam txhab ua ntaub ntawv rau koj nrog rau nws cov ntaub ntawv uas nws sau thaum lub sijhawm nws tuaj kuaj teb. Koj yuav txais ib tsab ntawv tib si thiab, thiab koj yeej hais tau yog qhov twg tsis yog lawm.

Lub tuam txhab mam li xa ib tsab ntawv txiax txim tuaj rau koj paub yog hais tias lawv npaj siab yuav ua ntaub ntawv pov thawj rau koj daim teb. Daim ntawv no, tej zaum yuav muaj cov nqe lus “yuav tsum ua li cas thiab li yuav tuav tau ntaub ntawv pov thawj ua ntu zus mus.” Cov lus no yog los ntawm tus neeg saib koj cov ntaub ntawv es nws pom tau hais tias koj tshuav qhov twg thiab qhov twg uas koj yuav tsum ua kom tau zoo dua. Yog hais tias koj daim teb muaj teeb meem loj yuav tsis dhau cai, tej zaum koj yuav txais ib tsab ntawv hais tias tsis dhau cai. Cov teeb meem zoo li no, feem ntau yeej yuav hais tau yog hais tias koj tsis tau txhob txwm ua txhaum cai lossis dag txog koj cov haujlwm.

Koj daim ntawv pov thawj hais tias tsis siv tshuaj rau, tej zaum lawv yeej yuav muab xa ua ke nrog daim ntawv txiax txim tuaj rau koj lossis tej zaum nws mam tuaj nws tom qab. Daim ntawv pov thawj no, yuav nyob rau ntawd siv mus kom txog rau thaum koj tsis yuav lawv, raug nres, lossis raug ywv lawm. Thaum tau daim ntawv pov thawj no lawm ces koj muaj cai muag tau koj cov qoob loos uas koj teev rau hauv hais tias yog cov tsis siv tshuaj rau.

Tuav Ntaub Ntawv Txhua Yam rau Thaum Lawv Tuaj Kuaj Ib Xyoos Ib Zaug

Tuav ntaub ntawv tseg teev txhua yam haujlwm qoob loos thiab rau dab tsi rau, ntim cia li cas, thiab muag li cas, tuav txhua cov ntaub ntawv no cia rau thaum uas lawv rov tuaj kuaj dua rau lwm xyoo. Yuav tsis khoo kom koj yuav tsum siv vib this li cas tuav ntaub ntawv—koj sau cia rau cov phau ntawv xwb los tau, muab ntsaws tais cia ua ib kem ib kem los tau, lossis muab teev tseg rau hauv lub hlwb hlau (computer) los tau. Tsuav kom koj cov ntaub ntawv no muaj txhij thiab teev tau meej meej xwb kom leej twg saib los tau taub, thaum koj tsis nyob rau ntawd.

Txhua txhua xyoo koj yuav tsum ua ib daim ntawv thov mus tauj dua tshiab. Yog hais tias koj ho txiax txim tsis yuav koj cov ntaub ntawv pov thawj hais tias tsis siv tshuaj rau qoob loos lawm no ces, koj yuav tsum hu rau koj lub tuam txhab thiab muab koj cov ntaub ntawv pov thawj no cob rau lawv hais tias koj tsis yuav lawm. Yog hais tias koj tsis ua li no thiab koj tsis ua daim ntawv thov tauj dua tshiab txhua xyoo, no ces lub tuam txhab yuav pib lawv qhov txhaj txheem los mus ywv koj daim ntawv pov thawj hais tias tsis siv tshuaj rau qoob loos. Yog koj tus kheej koj cia li txiax txim tsis yuav daim ntawv pov thawj no lawm xwb no ces koj yuav pib dua tau twg los yeej tseem tau.

Thov Kuab Nyiaj Kom Lawv Rov Ib Qho Nyiaj Pab Koj Them

Koj yeej thov tau kom lawv rov ib qho nyiaj ua tej ntaub ntawv pov thawj no rau koj thiab yeej tau txog li ntawm 75 feem pua lossis \$750 rau ib zaug twg uas koj siv nyiaj ua tag nrho txhua yam rau cov ntaub ntawv pov thawj no. Cov nyiaj los mus pab txhawb qhov kev pab no uas sawv daws siv siv heev, yog los ntawm tsoom fww ntawm USDA National Organic Program thiab, nyob ntawm seb koj nyob qhov twg, ces nws yeej los ntawm lub xeev uas koj nyob lub hoobkas saib xyuas kev ua liaj ua teb lossis koj lub zos lub hoobkas pab rau cov neeg ua teb Farm Service Agency (FSA). Hu rau lub hoobkas FSA nyob rau

hauv koj lub zos lossis koj lub xeev lub hoobkas saib xyuas kev ua liaj ua teb, kom lawv muaj ib daim ntawv thov rau koj lis.

Npaj Koj Tus Kheej Rau Thaum Lawv Tuaj Kuaj Seb Puas Tsuas Tshuaj qhov twg & Thaum lawv cia li tuaj tshwm plaws ntawd Tuaj Kuaj

Tsoom fwm USDA yuav tsum kom lub tuam txhab ua ntaub ntawv rau koj, lawv yuav tsum tuaj kuaj seb puas tsuas tshuaj qhov twg thiab lawv yuav tsum cia li tuaj tshwm plaws tsis hais qhia rau koj paub ua ntej, tuaj kuaj koj cov haujlwm uas lawv ua ntaub ntawv pov thawj rau koj txhua xyoo. Feem ntau qhov no mas tsis xaiv tswv ua rau li, raug koj ces lawv tuaj kuaj lawm xwb tabsis txhua xyoo twg lawv tuaj kuaj koj daim teb tag es yog lawv muaj kev txhawj xeeb qhov twg ces lawv yuav rov tuaj kuaj lossis yog muaj neeg tsis txaus siab rau koj tau mus foob koj rau koj lub tuam txhab. Tus neeg uas tuaj kuaj koj ntawd, tej zaum nws yuav nqa koj ib co qoob loos uas koj twb sau tau lawm koj mus kuaj lossis nws mus nqa kiag hauv daim teb. Lawv koj mus kuaj seb puas muaj cov tshuaj uas txwv tsis pub siv nyob rau hauv.

Paub Txog Txoj Cai Khoo Nruj rau ntawm Txoj Kev Tsis Siv Tshuaj

Txoj Cai Khoo Nruj Rau Ntawm Txoj Kev Tsis Siv Tshuaj (Strengthening Organic Enforcement (SOE)) sau tsim tawm thaum lub lb Hlis ntuj 2023 koj los pib siv txij li hnuv Peb Hlis Ntuj tim 19, 2024 los mus. Txoj cai SOE pab los cheem kom tsis txhob muaj qhov uas dag tau hais txog cov qoob loos uas tsis siv tshuaj rau; pab txhawb kom ruaj cov neeg ua teb tsis siv tshuaj rau lawv txoj kev pom, cov neeg los mus ua cov haujlwm no, thiab cov tuam txhab ua ntaub ntawv; thiab pab kom zoo tsoom fwm USDA txoj kev lawv siv los mus tswj sawv daws. Tsis tas li, txoj cai no los mus pab tiv thaiv sawv daws lo lus thiab kev sib ntseeg siab txog ntawm txoj kev tsis siv tshuaj rau qoob loos, thiab txhawb cov neeg ua teb thiab kom pej xeeb sawv daws muaj txoj kev ntseeg siab tau rau tsoom fwm USDA lub kas uas lawv ua ntawv nplaum lo rau cov qoob loos hais tias tsis siv tshuaj rau, los ntawm txoj kev siv siv zog txhawb cov kev los mus khoo thiab tswj txoj kev tsis siv tshuaj rau qoob loos, pab kom taug qab tau txhua yam uas tawm ntawm daim teb los rau thaum muag rau pej xeeb, ua kom ntau qhov chaw tso cai txais tos cov qoob loos no, thiab muaj kev sib pab sib khoom kom nruj kom zoo ib puag ncig txoj kev ua teb tsis siv tshuaj no.

QHIA TSWV YIM XAIV IB TUG LOS UA NTAUB NTAWV

Muaj ntau lub tuam txhab uas USDA-lees txhawb los mus ua cov ntaub ntawv no. Mus saib cov lus piv txwv uas neeg nug thiab txhua yam uas koj los xam tau, nyob hauv qab, los mus pab koj nrhiav kom tau ib lub tuam txhab ua ntaub ntawv uas yuav haum koj cov haujlwm thiab mus saib Marbleseed lub vevxais nyob rau ntawm <https://marbleseed.org/resources/organic-resource-directory> thiab mus nrhiav ntawm “cov tuam txhab ua ntaub ntawv” (“certification agency”) mus saib tag nrho cov tuam txhab cov npe teev rau hauv.

Nrog cov tuam txhab ua ntaub ntawv no tham:

Koj puas ua ntaub ntawv rau hom haujlwm li kuv cov?

Ib lub tuam txhab twg uas nws paub zoo txog hom haujlwm koj ua, nws yuav muaj cov lus teb koj uas yuav txhab txhais tau cov kev cai zoo dua rau koj.

Koj puas ua ntaub ntawv rau lwm daim teb uas nyob rau qhov chaw kuv nyob thiab?

Muaj tej lub tuam txhab mas nws tsuas ua ntaub ntawv rau cov teb uas nyob rau ib thaj tsam twg xwb lossis rau tej lub xeev xwb. Thaum koj paub tau lawm hais tias lub tuam txhab twg ua tau ntaub ntawv rau thaj tsam uas koj nyob, koj yuav tsum nrhiav lub kom muaj cov neeg yuav tuaj kuaj teb uas nyob ze koj. Ib qho ntawm cov nqi them nyiaj ua cov ntaub ntawv no yog them tus neeg tuaj kuaj teb lub sijhawm nws tuaj deb li cas tuaj thiaj li txog koj daim teb. Cov neeg kuaj teb no feem ntau lawv ua ib zaug mus kuaj tag nrho cov teb uas nyob sib ze ua ke ces tus nqi tuaj ib zauj ntawd muab faib rau sawv daws sib pab them, txawm li cas los xij, yog tus neeg kuaj teb ntawd nyob ze koj ces yuav pheej yig zog. Vim hais tias cov neeg kuaj teb no, lawv tso npe ua haujlwm nrog ob peb lub tuam txhab ua ntaub ntawv, yog li no koj muaj ob peb txoj hauv kev xaiv.

Yuav raug nyiaj li cas ua cov ntaub ntawv no?

Saib kom koj paub tseeb hais tias tag nrho yuav raug nyiaj li cas ua ntej koj pib thov ua ntaub ntawv. Cov coob ntawm cov tuam txhab ua ntaub ntawv no lawv yeej tso lawv tus nqi. Cov tuam txhab no, tej zaum mas lawv yuav tib tug nqi ua ntaub ntawv tag nrho rau koj xwb, nyob ntawm seb yuav ua hom ntaub ntawv twg lossis nyob ntawm seb koj ua teb muag cov qoob loos tsis siv tshuaj rau no ntau npaum li cas. Tu nqi tuaj mus kuaj teb no mas nws txawv ib xyoo rau ib xyoo, yog li no koj yuav tsum nug seb lawv laij lawv tus nqi li cas. Tej zaum tseem yuav muaj ib tug nqi ntixiv rau thiab los mus ua “tswv cuab” (“membership”) lossis nqi “saib xyuas ntaub ntawv”. Ib txhia mas yog koj kom lawv saib ib qho ntixiv ces lawv xaab nqi ntixiv rau thiab, hos ib txhia mas lawv muab suav tag nrho ua ib tug nqi ua ntaub ntawv rau koj lawm xwb.

Ua ntaub ntawv sai npaum li cas?

Yog hais tias koj teem tau sijhawm yuav tsum muag cov mis nyuj uas tsis siv tshuaj rau, tsis pub dhau hnuv teem tseg ntawd lawm, xav muag koj cov pob kws hauv teb rau neeg, lossis ua tau zaub ntsuab ntov ntov xav muag, saib koj paub tseeb hais tias lub tuam txhab ntawd yuav ua tau txhua yam rau koj kom ncav koj lub sijhawm, li no mas koj thiaj li muaj cai muag koj cov khoom hais tias yog hom tsis siv tshuaj rau, thaum nws tiav lawm. Tej zaum, yog hais tias koj xav kom tau sai no mas, koj yuav tau ntixiv nyiaj rau.

Koj puas muaj lwm cov kev pab ua ntaub ntawv?

Tej zaum mas koj hos yuav xav tau lwm yam kev pab xws li ua ntaub ntawv mus dav tshaj qhov uas tsis siv tshuaj rau qoob loos xwb tseem mus ua lwm yam los pab daim av thiab tej tsiaj txhu ib puag ncig kom zoo tshaj (Regenerative Organic Certification), lossis ua ntaub ntawv rau GAP, lossis ua pov thawj hais tias pub nyom rau noj nkaus nkaus xwb. Nug seb lub tuam txhab ntawd puas tuav lwm cov haujlwm ua pov thawj

rau lwm yam uas yuav poob rau sab nrauv thiab uas tej zaum yog qhov uas koj xav tau thiab.

Tham nrog cov neeg ua teb ze koj:

- Koj puas zoo siab rau txoj kev pab uas koj tau txais?
- Puas muaj neeg teb xov tooj lossis hu koj rov qab sai?
- Lub tuam txhab puas pab koj ua cov ntaub ntawv kom tiav?
- Nws puas muaj nws ib co ntaub ntawv zoo rau cov neeg ua teb siv teev txhua yam hauv lawv daim teb tseg?
- Puas muaj ntawv tshaj tawm qhia txog tswv yim tshiab lossis cov kiab khw chaw muag khoom hloov li cas lawm lossis qhia txog tsoom fww cov kev cai?
- Lub tuam txhab ntawd puas muaj kev kawm qhia kom sawv daws paub lossis puas tuav koom ntsoos rau sawv daws tuaj ua ke tuaj kawm?
- Lawv cov kev cai thiab ntaub ntawv puas tau taub yooj yim thiab puas siv tau yooj yim?
- Koj tos ntev npaum li cas lawv mam li tuaj kuaj teb, ntev npaum li cas lawv mam li saib koj cov ntaub ntawv tiav, thiab ntev npaum li cas lawv mam xa daim ntawv pov thawj tuaj rau koj?

Tham nrog cov yuav khoom ntawm koj:

Nug cov neeg yuav khoom ntawm koj seb lawv nyiam lub tuam txhab ua ntaub ntawv twg dua. Yog hais tias muaj neeg xav kom tau kev tso cai rau koj cov khoom tsis siv tshuaj koj tau mus muag txawv teb chaws, tej zaum koj cov khoom los yog cov txhoj ua ntaub ntawv yuav tsum raug tshoj ntsuam dua kom raws li txoj kev tswj.

HU RAU PEB LOSSIS MUS SAIB PEB LUB VEVXAIS!

Yog hais tias koj tseem tshuav lus nug ntshiv txog ntawm txoj kev ua ntaub ntawv lossis cov kev cai tu qoob loos uas tsis siv tshuaj rau, hu tau rau Marbleseed Organic Answer Line ntawm 888-906-67347 ext. 1 lossis email specialist@marbleseed.org. Tsis tas li ntawd koj yeej nrhiav tau ntau yam kev pab nyob rau hauv peb Marbleseed lub vevxais thiab nug tau ib co qauv pub dawb uas peb sau tawm nyob rau ntawm <https://marbleseed.org/resources/organic-resource-directory>.

TXOJ KEV PAB KOOM TES PAB HLOOV MUS UA TEB TSIS SIV TSHUAJ YUAV PAB TAU!

Los ntawm Txoj Kev Pab Koom Tes Pab Hloov Mus Ua Teb Tsis Siv Tshuaj (Transition to Organic Partnership Program (TOPP)), koj lis tau ntawv mus thov kev pab kawm los ntawm ib tug neeg uas nws paub ntau yam txog txoj kev ua teb tsis siv tshuaj. TOPP txoj kev muab ib tug neeg los pab koj, yuav pab tau koj teeb koj lub hom phiaj, taug txoj kev hloov koj txoj kev ua teb thiab ua ntaub ntawv, txais kev pab thiab tswv yim los ntawm cov neeg uas paub, thiab txoj hau kev koj rau sab ua teb tsis siv tshuaj rau thiab ua ntaub ntawv, thiab txais kev pab txhawb koj sau ib daim OSP. Yog hais tias tug neeg peb muab rau koj tsis thwj koj, koj yeej tso npe tau nrog ib tug neeg sau huab sau cuab pab koj 1:1 nrog ib tug neeg pab koj sau koj daim OSP, kawm txoj kev yuav tuav ntaub ntawv rau koj daim teb li cas thiaj li yuav yooj yim thiab ua haujlwm zoo rau koj, txais kev pab npaj koj rau thawj thawj hnub lawv tuaj kuaj koj daim teb, thiab tau taub seb koj daim teb yuav ua li cas thiaj li caum cuag cov kev cai ua teb tsis siv tshuaj. Mus kawm kom paub seb muaj kev pab li cas los ntawm TOPP ntawm <https://www.organictransition.org>

Daim ntawv teeb cov lus muaj tseeb no tau kev txhawb los ntawm tsoom fww USDA Transition to Organic Partnership Program, ib qho kev pab los ntawm tsoom fww USDA Organic Transition Initiative haujlwm tuav los ntawm USDA Agricultural Marketing Service National Organic Program.

